



Sarajevo, 27.01.2022. godine


SAOPŠTENJE ZA MEDIJE
Mladi bi napustili BiH u slučaju ratnog sukoba

Posredstvom online anketnog upitnika, Centar za sigurnosne studije je od 13. do 25. januara proveo istraživanje javnog mnijenja o trenutnoj društveno-političkoj situaciji u BiH. Istraživanje se fokusiralo na populaciju s područja entiteta FBiH. Iako je anketiranje obuhvatilo manji uzorak ispitanika, nalazi istraživanja predstavljaju zanimljiv izvor spoznaja o tendencijama u razmišljanju građana/ki. Većina ispitanih su: a) muškarci (63%); b) starosne dobi od 20 do 29 godina (64%); te c) višeg ili visokog obrazovanja (74%).

Gotovo 60% ispitanih ne vjeruje da će u BiH doći do ratnog sukoba. Skoro polovina njih (47%) bi, teoretski, pokušalo napustiti BiH, ako bude izvjesno da će započeti ratni sukob. S druge strane, 33% njih to ne bi učinilo, dok preostali nisu znali odgovoriti na postavljeno pitanje. Blizu tri četvrtine ispitanih (72%) vjeruje da su nedavni incidenti širom BiH potaknuti unutrašnjim i vanjskim faktorima. Polovina ispitanih smatra da građani BiH, političke stranke i vanjski faktori dijele odgovornost za trenutnu društveno-političku situaciju u zemlji, dok njih 42% najodgovornijim smatraju domaće političke stranke. Četrdeset i dva posto ispitanih smatra da građani BiH, političke stranke i vanjski faktori dijele odgovornost za zaustavljanje pogoršavanja trenutne situacije. U ovom kontekstu, približno ravnomjeran procenat ispitanih smatra da su najodgovornije političke stranke (22%) ili građani BiH (19%). Dugoročno, za boljšak građana BiH većina (64%) smatra da su najvažniji različiti modaliteti ubrzanih evroatlantskih integracija, dok je ubrzanom prijemu u NATO članstvo data blaža prednost u odnosu na EU.

Činjenica da bi skoro polovina ispitanih, mahom mladih i visokoobrazovanih, pokušalo napustiti BiH u slučaju izvjesnosti od izbijanja ratnog sukoba govori da trenutna retorika i situacija ne odgovaraju njihovim stvarnim interesima i potrebama. Nadalje, prepoznavanje da su i vanjski faktori poticali nedavne incidente u BiH ukazuje da u društvu postoji izražena svijest o malignom stranom uticaju. Ovo je momentum koji bi političke opcije trebale uvažiti i uvrstiti teme malignog stranog uticaja u svojim programima rada u oblasti vanjskopolitičkog djelovanja. Također, nalazi istraživanja upućuju da ispitanici smatraju da i građani snose dio odgovornosti za trenutnu situaciju, iako drastično manju u odnosu na političke stranke, ali istovremeno da imaju i moć odabira u kojem će se pravcu kretati zemlja. Budući da se BiH nalazi u izbornoj godini, ostaje da se vidi u kojoj mjeri će građani/ke birati političke opcije koje će istinski raditi u njihovu korist te koliko će stranke kvalitetno pripremiti programe rada u skladu sa stvarnim interesima i potrebama građana/ki. Evroatlantske integracije su nedvojbeno neke od najvažnijih. Davanje blage prednosti ubrzanom članstvu u NATO, ne samo da pokazuje da se trenutna situacija neupitno odrazila na individualni osjećaj sigurnosti građana/ki, ali i važnost NATO članstva u kontekstu njega, već i da građani/ke možda očekuju jedinstveniji i snažniji odgovor EU na destruktivne faktore unutar BiH.

S poštovanjem,


Benjamin Plevljak
Generalni sekretar Centra za sigurnosne studije

